

# QUATRIÈME PARTIE

## Le livre des métiers L'Agriculture, le Commerce, l'Industrie L'Artisanat.

### XLVIII — LOU TRAVAI E LI TRAVAIADOU (cop d'uei generau)

#### 1. Pèr durbi lou tai.

La lèi de naturo es que pèr viéure, cadun a de susa soun pan; cadun a de prene un mestié que pòu, d'aiours, èstre penible, bèn penible meme vo bèn, au countràri, gaire fatigant.

Dins lou proumié cas, pèr derraba sa vidasso, lou mesquin se brulo lou sang e bago camiso, sènso, pèr acò, gagna gros — alor que, qu a un mestié de bon raport, vèi à cha pau s'enfla soun vièsti souvènt sènso s'escourpouira, sènso se leva lou bedelet, sènso se desoungla.

Dins tóuti li cas, es bon de segui sa voucacioun, de segui sa butado; es bon de prene un mestié que v'agrado, que fasès voulountié. E sarié uno errour de se trop fourça, de faire, en reguignant proun, un mestié qu'es pas fa pèr vous, un mestié pèr lou quau mancas de dispausicioun, pèr lou quau avès pas lou tip, ni mai la giho (coume se dis) e que fasès em'un gros mau de couar.

#### 2. Li grade di travaiaire e di travaiadou.

Aquéu que rintro dins lou round, que risco un affaire, qu'es dins uno entre-presso pòu èstre lou mètstre, vo bèn rèn qu'un emplega (coumés, oubrié, prefachié, varlet, tout-obro, fatigoun, ome de fatigo, ome de peno, elèvo-estagiàri, varletoun, bachacoun — mètstre-varlet, cor-mètstre, lou proumier emplega, lou segound (dóu mètstre), lou bras dre dóu patroun (dóu capoulié, dóu capo, dóu chefe, dóu plus tant mai, d'aquéu qu'es à la tèsto, de lou qu'es l'amo de l'oustau).

#### 3. Lou mètstre.

Que siegue en plaço, en titre vo bèn que fague souidamen l'entanterin, es l'affaire dóu mètstre de coumanda, de teni l'empento, de mena la barco; d'agué lou gouvèr, de tout beileja; de tout mestreja, pièi de liga lis esfors de tóuti. De cop lou patroun es tout soulet. A touto la cargo, e tout lou fais, tout ié toumbo dessus, es éu que porto tout lou bast. Mai pièi, lou mètstre pren un assoucia; es de mita em'eu (fai de mita em'eu) — partejon li benefice (lou gasan).

D'autri fes noste ome se pren un gerènt, un baile, e ié laisso un pau la brido sus lou coui (= la caussano sus la tèsto); ié douno mand de faire quaucarèn, e pièi ié laisso carto blanco, ié laisso li couide franc.

Enfin, pòu arriba qu'à la tèsto d'uno entre-presso i'ague uno soucieta ounte tóuti lis aciounàri an uno o mai que d'uno part, un o mai que d'un quirat.